

Dekretu Governu N° 19/2017
12 de Maio

APROVA PROSEDIMENTUS TÉCNIKUS SIRA BA HALA'O ELEISAUN
PREZIDENSIAL IHA RAI-LIUR

Sidadaun Timor-oan sira ne'ebé maka hela iha rai-liur goza protesauun Estadu nian hodi ezerse nia direitu maiske sira la hela iha rai-laran.

Hodi buka atu responde ba prinsípiu konstitusional ida ne'e, hetan ona garantiha, ba dahuluk, hafoin restaura tiha independénsia nasaun nian, ezersisiu direitu votu ba sidadaun Timor-oan hirak ne'ebé maka hela iha rai liur, atu sira bele, tuirmai, vota hodi hili titular orgaun soberania sira.

Lei eleitoral ba Parlamentu Nasional nian determina ona katak prosedimentu tékniku sira ba hala'o votasaun iha estranjeiru tenki regula liu husi Dekretu Governu. Ho nune'e, diploma ida ne'e estabese prosedimentu tékniku sira balunn ne'ebé atu garante prosesu votasaun no kontajen votu sira, nomós apuramentu rezultadu eleitoral ba eleisaun Parlamentar nian iha rai-liur.

Alein ida ne'e, estabese mos regra sira ne'ebé maka fiskais Partidu ka koligasaun sira, observador eleisaun sira no profesional komunikaun sosial sira bele halo tuir durante halo atividade sira akompañamentu, observaun no kobertura ba atu eleitoral ne'e rasik.

Ho nune'e,

Governu dekreta, bazeia ba saida maka prevé iha n° 4 artigu 37°-A husi Lei no 6/2006, 28 Dezembru, altera ho Lei n° 6/2007, 31 de Maio, ho Lei n° 7/2011, 22 Juñu, ho Lei n° 1/2012, 13 Janeiru, ho Lei n° 7/2012, 1 Marsu, no ho Lei n° 5/2017, 5 Maio, atu vale nudar Regulamentu, sira tuir mai ne'e:

Kapítulu I
Dispozisaun Jeral

Artigu 1°

Objetu no âmbito aplikasaun

1. Dekretu ida ne'e aprova regra sira hirak ne'ebé maka regula votasaun, kontajen votu sira no apuramentu rezultadu ba operasaun eleisaun ba deputado sira Parlamento Nasional nian ne'ebé hala'o iha rai liu.
2. Dekretu ida ne'e regula partikularmente prosesu establesimentu sentru votasaun sira, kontajen votu sira, rezultadu tabulasaun inisial, fiskais no observador eleisaun sira, kobertura mediatiku ba prosesu votasaun iha rai liur ba eleisaun parlamentar nian

Artigu 2°

Kapasidade eleitoral ativa

1. Sidadaun timor-oan ne'ebé maka bót liu ona tinan sanulu-resin-hitu, goza kapasidade eleitoral ativa.
2. Para bele ezerse direitu votu tenki inskreve iha resensiamentu eleitoral.

Kapítulu II
Oinsá organiza prosesu eleitoral

Seksaun I
Sentru Votasaun no Estasaun Votu sira
Artigu 3º
Sentru Votasaun

1. Fatin ne'ebé maka eleitor sira atu ezerse sira nia direitu atu vota naran sentru votasaun
2. Iha sentru votasaun ida bele iha estasaun votu ida ka liu husi ida.

Artigu 4º
Fatin funsionamentu

Sentru votasaun funsiona iha fatin hirak ne'ebé maka termina tiha kedas ona liu husi dekretu governu ida ne'ebé maka aprova organizasaun no funsionamentu sentru votasaun no estasaun de votu sira nian.

Artigu 5º
Lista sentru votasaun no estasaun votu sira

1. STAE sei fó sai númeru no lokalizasaun ba sentru votasaun no estasaun votu sira até loron tolu-nulu antes loron votasaun, no bele mos hetan alterasaun ruma até loron 10 antes data realizasaun votasaun nian.
2. STAE sei haruka kópia lista kompleta husi fatin sentru votasaun no estasaun votu sira nian ba Komisaun Nasional Eleisaun, ne'ebé tuir mai sei temi deit ho naran CNE, nomós orgaun komunikasaun sosial sira hodi halo divulgasaun
3. Informasaun ne'ebé maka prevé iha númeru sira foin-liu-ba/anterior sei komunika ba Ministériu Negósiu Estranjeiru no Kooperasaun (MNEC), depois de taka iha lokal estilu misaun diplomátika sira nian no postu konsular ne'ebé uza nudar sentru votasaun no estasaun votu.

Artigu 6º
Kódigu identifikasaun sentru votasaun no estasaun votu sira

1. Sei atribui kódigu numérikus ida hodi identifika kada sentru votasaun no estasaun votu
2. Kódigu ne'ebé temi iha númeru ida foin liu ba ne'e forma husi díjitu sia, no husi ida ne'e, díjitu lima primeiru ne'e representa sentru votasaun no hat ikus representa estasaun votu, no ho ida ne'e permite atu identifika kada sentru votasaun no estasaun votu sira.

Artigu 7º
Horáriu funsionamentu

1. Iha loron votasaun, sentru votasaun no estasaun votu sira sei loke iha tuku hitu no taka iha tuku sanulu-resin-lima, no durante período loke ne'e, sei funsiona sein interupsaun.
2. Kuandu oras taka nian, hanesan ne'ebé maka temi iha númeru anterior, liu ona, so ema hirak ne'ebé maka iha altura ne'ebá forma tiha ona iha líña maka bele ezerse nia direitu votu, kontrolador líña sira sei haré ida ne'e no komunika ba sekretariu sentru votasaun nian.

Artigu 8º
Fatin ne'ebé eleitor ezerse nia direitu votu

1. Iha estranjeiru, eleitor ida-idak vota iha sentru votasaun sira ne'ebé maka funsiona iha unidade jeográfika resenseamentu eleitoral ne'ebé nia inskreve bá.
2. Too loron hitu depois prazu ne'ebé prevé iha n.º 1 husi artigu 5.º, STAE sei envia ba xefe misaun diplomátika sira no, karik presiza, xefe servisu konsular sira iha área jeográfika ne'ebé hili ona atu tau sentru votasaun, lista husi eleitor sira ne'ebé inskreve ona atu vota iha sentru votasaun sira ne'e.

Artigu 9º
Proibisaun prezensa iha sentru votasaun

1. Sei la admitti atu mai iha sentru votasaun no estasaun votu nian, eleitor hirak ne'ebé maka apresenta síntomas momós katak ema ne'e konsome alkool ka lanu hela ho droga sira (estupefasiendes), ema hirak ne'ebé maka lori kilat ka objetu sira ne'ebé hanesan, nomós ema hirak ne'ebé maka, ho kualker meiu, perturba no tenta perturba orden no disiplina iha fatin votasaun no ninia sorin-sorin sira, no bele lori ba eventual responsabiliade kriminal.
2. Mos sei la hatan, atu marka prezensa iha sentru votasaun no estasaun votu, sidadaun eleitoral hirak ne'ebé maka ezerse tiha ona nia direitu vota nian, sira ne'ebé maka la'os fiskais kandidatura sira nian, la'os profesional orgaun komunikaun sosial no la'os observador eleisaun ne'ebé hetan ona kredensial.

Artigu 10º
Proibisaun propaganda eleitoral

1. Iha loron eleisaun, proibidu atu halo kualker tipu propaganda eleitoral iha fatin hirak ne'ebé maka funsiona sentru votasaun no estasaun votu no tenki dok metru no tooo metru ruanulu-resin-lima husi fatin sentru votasaun.
2. Propaganda eleitoral ne'e maka hanesan taka autokolante sira (stiker), kamizolas, panfletu, símbolu, poster, emblema, sigla, bandeira sira no sira seluk tan, nune'e mos ho atividade sira promosaun kandidatura, ligadu ba prosesu eleitoral ne'ebé maka la'o hela.
3. Karik verifica katak iha propaganda eleitoral ruma ne'ebé maka klaramente viola saida maka hateten iha número 1 husi artigu ida ne'e ninian, kompete ba prezidente sentru votasaun atu haruka hasai propaganda sira ne'e.
4. Fiskais kandidatura sira, labele, iha sirkunsansia saida deit, apresenta-an iha sentru votasaun ho símbolu ka objetu sira ne'ebé identifika katak sira pertense ba partidu politiku ka koligasaun partidaria sira ruma
5. Karik verifica saida maka temi iha número anterior, prezidente sentru votasaun haruka fiskal sira hodi hasai símbolu ka objetu sira husi partidu politiku ka koligasaun partidaria sira ne'e, no karik iha dezobediensia ruma, prezidente votasaun hasai tiha fiskal ne'e nia akreditasaun no haruka nia atu abandona sentru votasaun no regista kedas akontesimentu ne'e iha ata operasaun eleitoral nian.

Seksaun II
Oficial eleitoral
Artigu 11º
Oficial eleitoral

1. Ofisial eleitoral maka sidadaun nasional hirak ne'ebé selesionadu ona husi STAE hodi asegura funksionamentu sentru votasaun no estasaun votu sira durante prosesu eleitoral
2. Iha loron eleisaun, bele latama servisu, Ofisial eleitoral hirak ne'ebé maka mós funsionáriu públiku sira, ajente ka traballador administrasaun pública Repúblika Demokratika Timor-Leste nian no ida ne'e sei la prejudika sira nia direitu no regalia sira, inklui direitu ba retribuisaun, basta maka sira tenki iha dokumentu ida ne'ebé STAE emite hodi komprova katak sira ezerse duni sira nia funsaun nudar ofisial eleitoral iha loron ne'e.

Artigu 12º
Selesaun Ofisial Eleitoral

1. STAE maka hili ofisial eleitoral sira husi eleitor sira ne'ebé maka resensiadu ona iha unidade jeográfika resenseamentu eleitoral ne'ebé maka sentru votasaun no estasaun votu sira ne'e lokaliza ba, atu nune'e sira bele ezerse sira nia funsaun.
2. Atu sai ofisial eleitoral, sidadaun ne'e tenki hatene lé, hakerek no iha kuñesimentu oituan kona ba aritmética.
3. Kandidatu sira ne'ebé atu prienxe vaga hodi ezerse funsaun nudar ofisial eleitoral ne'e pre-selesionadu husi Diretor Munisipal STAE nian iha unidade jeográfika resenseamentu eleitoral ne'ebé sei lokaliza sentru votasaun sira ne'ebé ofisial eleitoral sira ne'e atu dezempeña sira nia funsaun bá.
4. Depois prosesu pre-selesaun ne'e remata tiha, Diretor Munisipal STAE haruka ba Diretor Jeral STAE, lista kompleta husi kandidatu sira ne'ebé maka bele hala'o funsaun nudar ofisial eleitoral, akompaña kedas ho sira ida-idak nia "Kurrikulum Vitae".
5. Metade husi kandidatu ne'ebé selesionadu tenki ser husi sexu femininu.
6. Bazeia ba informasaun ne'ebé prevé iha número 4, Diretor Jeral STAE, depois de rona husi CNE, sei nomeia ofisial eleitoral hirak ne'ebé maka sei ezerse sira nia funsaun iha sentru votasaun.
7. MNEC sei distribui despacho Diretor-Jeral STAE nian ne'ebé refere iha número anterior ba misaun diplomática sira no servisu konsular sira iha área jeográfica sira ne'ebé sei funsiona sentru votasaun sira iha estrajeiru
8. Labele obriga ema ida atu hala'o funsaun nudar ofisial eleitoral, kontra nia vontade livre no expressa.
9. CNE sei supervizona prosesu selesaun kandidatu sira hirak ne'ebé maka sei hala'o papel nudar ofisial eleitoral.
10. Karik ofisial eleitoral ruma falta tiha ka lakohi ezerse nia funsaun, sei troka tiha nia ho suplente ne'ebé, ba ida ne'e, dezinadadu husi despacho ne'ebé maka refere iha n.º 6.

Artigu 13º
Formasaun Ofisial Eleitoral

1. Kandidatu sira ne'ebé STAE hili ona hodi sai nudar ofisial eleitoral, sei tuir formasaun ne'ebé prepara no realiza husi STAE, ho CNE nia supervizaun.

2. Oficial sira labele komesa sira nia funsaun, antes assina deklarasaun kompromissu, ne'ebé husu atu rai sijílu kona ba faktu sira, informasaun no prosedimentu eleitoral sira ne'ebé maka sira sei hatene durante hala'ó sira nia funsaun.
3. Deklarasaun kompromissu ne'e, STAE maka sei elabora no sei vinkula ka kesi oficial eleitoral sira to prosessu eleitoral ne'ebé sira ezerse funsaun bá ne'e remata.
4. Representante no fiskais kandidatura sira, nune'e mos ho observador nasional no internasional sira, bele akompaña formasaun ne'e, maibé laiha direitu atu intervêin iha prosessu.

Artigu 14º
Oficial Eleitoral sira nia dever

1. Hodi ezerse sira nia funsaun, oficial eleitoral sira vinkuladu atu kumpri dever sira hanesan tuir mai ne'e:
 - a. Tuir formasaun ne'ebé STAE realiza;
 - b. Mantein komportamentu ne'ebé neutral no imparcial ba kandidatura sira hotu-hotu;
 - c. Garante sijílu (labele fo sai arbiru) informasaun ho karakter rezervada ne'ebé maka hatene durante hala'ó knar;
 - d. Hala'ó ho didiak no lolós, tarefa sira hotu, to prosesu eleitoral ne'e remata;
 - e. Tenki relata kedas ba superior sira, karik mosu irregularidade ruma durante prosessu votasaun, kontajen no apuramentu rezultadu sira;
 - f. Kumpri ho lolós orientasaun sira hirak ne'ebé maka superior sira fó
2. Oficial eleitoral sira, kuandu la kumpri sira nia dever sira, sei responsabiliza tuir lei ne'ebé vigora

Artigu 15º
Kompozisaun sentru votasaun no estasaun votu sira

1. Kada sentru votasaun no estasaun votu sira kompostu husi oficial eleitoral hanesan tuir mai ne'e:
 - a. Prezidente sentru votasaun nian ida, ne'ebé responsabiliza ba sentru votasaun no mos estasaun votu sira sira;
 - b. Sekretáriu ida ba estasaun votu ne'ebé maka responsabiliza ba estasaun votu ne'e, kordena servisu ho oficial estasaun votu sira no responde direktamente ba presidente sentru votasaun nian;
 - c. Oficial nain-hat ne'ebé sei verifica eleitor sira nia identifikasaun;
 - d. Oficial ida hodi kontrola buletin votu nian;
 - e. Oficial nain-ida sei kontrola urna eleitoral/kaixa votasaun nian;
 - f. Oficial ida hodi kontrola no tau tinta-indelével ba eleitor sira nia liman;
 - g. Oficial nain rua para kontrola forma-liña/fila.
2. Estasaun votu ida bele funsiona nafatin ho deit oficial, mínimu, nain nen.
3. Karik oficial eleitoral sira falta tiha nain ida, sei substitui tuir termu sira ne'ebé hatur iha artigu 24º.

Artigu 16º
Prezidente Sentru Votasaun

1. Prezidente sentru votasaun nia papel maka:
 - a. Deklara loke estasaun votu no verifica identidade no kredensial husi sekretariu estasaun votu nian;
 - b. Asegura funcionamentu ne'ebé diak iha sentru votasaun tuir lei no regulamentu sira ne'ebé vigora;

- c. Haruka taka relasaun nominal kandidatu sira nian iha kedas entrada ba sentru votasaun nian;
 - d. Presta informasaun no transmite orientasaun servisu ne'ebé nesessariu atu bele garante operasaun eleitoral ida ne'ebé diak iha sentru votasaun ne'ebé nia prezide;
 - e. Suspende operasaun eleitoral karik iha perturbasaun ruma, agresaun ka violensia, iha sentru votasaun nomós iha sorin-sorin sira besik kedas iha ne'ebá;
 - f. Dirije kontajen votu sira no apuramentu inisial rezultadu sira iha sentru votasaun;
 - g. Ezerse votu kalidade kuandu haree katak nesessáriu;
 - h. Assina ata ho rezultadu kontajen votu sira nian iha sentru votasaun;
 - i. Organiza fiskais kandidatura sira iha sentru votasaun ne'ebé assina ata operasaun kontajen no apuramentu rezultadu sira nian;
 - j. Haruka dijitaliza ata operasaun kontajen no apuramentu rezultadu sira no garante haruka, liu husi via elektrónika, ba servisu sentral STAE nian;
 - k. Simu no enkamiña reklamasau ka rekursu sira hirak ne'ebé maka dirije ba ida-idak, CNE no ba Supremo Tribunal Justisa (STJ), liu husi representante diplomátiku ka konsular ne'ebé graduadu liu ke hala'ó nia funsaun iha unidade jeográfika resenseamentu eleitoral ne'ebé sentru votasaun no estasaun votu ne'e funsiona bá;
 - l. Anunsia rezultadu kontajen no apuramentu inisial no taka rezultadu ne'e iha fatin ne'ebé fasil para atu haree, iha kedas sentru votasaun ne'e rasik;
 - m. Garante enpakotamentu no entrega material eleitoral hotu-hotu ba representante diplomátiku ka konsular ne'ebé enkarega atu asegura transporta material sira ne'e mai Dili, atu nune'e bele entrega votu sira reklamadu, reklamasau no ata kontajen no apuramentu rezultadu sira ba assembleia apuramentu nasional no material eleitoral sira seluk ba STAE;
 - n. Dezempeña funsaun hotu ne'ebé prevista iha lei, regulamentu ka tuir ne'ebé superior sira haruka no funsaun sira ne'ebé maka la'os atribui ba orgaun seluk.
2. Prezidente Sentru Votasaun sei nomeia husi entre diplomata sira ida, tuir termu artigu 12.º nian.

Artigu 17º **Sekretariu estasaun votu**

Sekretáriu estasaun votu nia papel maka:

- a. Deklara loka estasaun votu no verifika identidade no kredensial husi ofisial eleitoral sira nian, fiskais kandidatura sira ne'ebé hala'ó sira nia funsaun iha fatin votasaun ne'e nomós observador sira ho mós profesional orgaun sira komunikaun sosial nian;
- b. Dirije prosessu verifikasaun kabina votu no dokumentu servisu nian iha estasaun votu
- c. Hatudu urna/kaixa votasaun mamuk ba ofisial meza sira, fiskais kandidatura sira, observador sira no eleitor ne'ebé marka prezensa, no tuir mai, husu ba ofisial verifikador identifikasaun nian nomós ofisial kontrolador urna eleitoral atu bele tau tiha selu ba sira no rejista número husi selu korespondente;
- d. Haruka taka edital ho kompozisaun meza estasaun votu nian iha estasaun votu, iha kedas fatin ne'ebé maka fasil para atu haree,;
- e. Garante liberdade no segredu votu, eleitor hotu-hotu nian;
- f. Garante manutensaun orden iha estasaun votu para asegura operasaun eleitoral bele la'ó ho didiak;

- g. Informa presidente sentru votasaun karik iha fali ona kondisaun hodi kontinua votasaun ne'ebé interrompe tiha tamba iha akontesimentu balun ne'ebé la normal, kalamidade natural ka perturbasaun orden públika ruma;
- h. Haruka sai husi estasaun votu, sidadaun sira ne'ebé maka la vota iha ne'ebá ou ka sira ne'ebé vota tiha ona;
- i. La admite atu tama iha estasaun votu, eleitor sira ne'ebé maka haree momós katak lanu hela ka hetan hela efeitu husi droga (estupefasiante) nian, no lori objetu balun ne'ebé maka bele kria perigu;
- j. Bandu kualker tipu propaganda iha estasaun votu nia laran, no hó distansia too metru ruanulu-resin-lima, no halo ida ne'e ho rekore ba forsa siguransa polisial;
- k. Autoriza entrega buletin votu foun ba eleitor sira, karik sira husu tamba halo sala wainhira sira prienxe ka tamba falta atensaun, no okorensia ida ne'e tenki rejista tiha kedas iha ata ida-idak;
- l. Tau karimbu ba buletin votu ne'ebé maka entrega fila fali, ho lia-fuan "cancelado", assina tiha kedas no rai didiak tiha iha envelope;
- m. Fo esklaresimentu nesesáriu, tuir eleitor nia pedidu, no iha kedas prezensa ofisial eleitoral sira, fiskais kandidatura sira no observador eleitoral sira, kona ba prosessu votasaun, maibé labele influencia fali eleitor sira nia sentidu votu;
- n. Husu ba fiskais kandidatura sira, keta sira iha reklamasaun balun atu apresenta karik;
- o. Simu protestu hotu no reklamasaun ne'ebé maka mosu, no tenki assina kedas nune'e, hanesan ofisial hotu-hotu estasaun votu nian;
- p. Halo mos funsaun sira seluk ne'ebé maka temi iha lei, regulamentu, ou sira ne'ebé superior haruka, maibé la'os funsaun hirak ne'ebé maka atribuida ona ba orgaun seluk.

Artigo 18º
Ofisial verifikador identifikasaun

1. Ofisial verifikador identifikasaun nia papel maka:
 - a. Identifika eleitor liu husi haree ho didiak kartaun eleitoral atualizadu no verifika didiak hodi haree, se dadus eleitor nian ne'e hakerek mos iha lista eleitor unidade jeográfika resenseamentu eleitoral nian ka lae;
 - b. Karik kartaun eleitoral laiha, bele identifika eleitor liu husi haree nia billete identidade ka passaporte timor nian no konfirma ho dadus eleitor nian ne'ebé maka tau iha lista eleitor unidade jeográfika resenseamentu eleitoral ida ne'e ninian;
 - c. Verifika se eleitor ne'e kumpre rekezitu legal ne'ebé ezije kona ba idade mínima tinan sanulu-resin-hitu iha laron eleisaun nian;
 - d. Haree didiak eleitor nia liman hodi bele garante katak nia seidak vota duni iha eleisaun ne'e;
 - e. Fo hatene ba ofisial kontrolador buletin votu katak ema ne'e iha direitu no bele entrega buletin votu ba nia;
 - f. Dezempeña mos funsaun hirak ne'ebé maka lei, regulamentu haruka ka superior determina mas la'os tok funsaun hirak ne'ebé maka atribui ona ba orgaun seluk.
2. Ba efeitu alínea a) husi número anterior, sei konsidera nudar atualizadu kartaun eleitoral sira ne'ebé maka laiha kuak ruma ka hatudu símbolu República Demokrátika Timor-Leste nian, ne'ebé aprova liu husi Lei nº 2/2007, laron 18 fulan Janeiru.

Artigo 19º
Ofisial kontrolador buletin votu

Ofisial kontrolador buletin votu nia papel maka:

- a. Tau karimbu no assina iha buletin votu nia kotuk;
- b. Entrega buletin votu ba eleitor;
- c. Presta informasaun ba eleitor ne'ebé simu ona buletin votu, iha kedas fiskais no observador sira nia oin iha estasaun votu, karik nia husu informasaun no esklaresimentu ruma kona ba oinsá atu vota, maibé labele indika ba sira, preferensia ruma ka sentidu votu ruma kona ba atu vota ba kandidatu ida ne'ebé;
- d. Indika no enkamiña eleitor ba kabina votu nian;
- e. Entrega buletin votu foun ba eleitor ho autorizasaun sekretáriu estasaun votu nian, karik eleitor husu, tamba buletin át tiha ka prienxe sala tiha;
- f. Dezempeña mos funsaun hirak ne'ebé maka lei, regulamentu haruka ka superior determina mas la'os tok funsaun hirak ne'ebé maka atribui ona ba orgaun seluk.

Artigu 20°
Ofisial kontrolador urna eleitoral

Ofisial kontrolador urna eleitoral nia papel maka:

- a. Garante guarda no siguransa urna eleitoral nian;
- b. Asegura katak eleitor koloka deit buletin votu ida ba urna eleitoral;
- c. Dezempeña mos funsaun hirak ne'ebé maka lei, regulamentu haruka ka superior determina mas la'os tok funsaun hirak ne'ebé maka atribui ona ba orgaun seluk.

Artigu 21°
Ofisial kontrolador aplikasaun tinta indelevel

Ofisial kontrolador aplikasaun tinta indelevel nia papel maka:

- a. Depois eleitor hatama tiha buletin votu ba urna laran, tau kedas tinta indelével ba liman-fuan indikador husi eleitor nia liman direita no sertifika katak tinta ne'e maran duni.
- b. Karik liman fuan indikador husi parte direita laiha karik, bele tau tinta indelével ba iha liman-fuan seluk husi liman hanesan, maibé karik liman lós rasik laiha, bele tau ba liman fuan ida iha parte karuk no sertifika duni katak tinta ne'e maran tiha;
- c. Karik liman rua ne'e laiha hotu, marka tinta indelével ne'e iha extremidade husi eleitor nia isin parte leten nian;
- d. Husu ba eleitor atu ses husi estasaun votu hafoin vota tiha;
- e. Dezempeña mos funsaun hirak ne'ebé maka lei, regulamentu haruka ka superior determina mas la'os tok funsaun hirak ne'ebé maka atribui ona ba orgaun seluk.

Artigu 22°
Ofisial kontrolador fila

Ofisial kontrolador liña/fila nia papel maka:

- a. Organiza liña/fila ne'ebé eleitor sira forma bá hodi hein atu vota, atu nune'e, so ema ne'ebé autorizada deit maka bele tama ba estasaun votu;
- b. Husu ba eleitor para bele kaer kedas iha sira nia liman kartaun eleitoral ne'ebé atualizadu, karik ida ne'e laiha, uza deit billete identidade ou passaporte timor nian, atu nune'e bele hatudu ba ofisial verifikador identifikasun;
- c. Iha tuku sanulu-resin-lima loraik iha loron votasaun nian, haree tok, eleitor hira maka hein hela iha liña para atu ba vota, atu nune'e bele halo tuir saida maka lei haruka katak se se deit maka atu mai tama iha liña depois de oras ida ne'e, sei la hatan;

- d. Husu ba fiskais kandidatura no observador sira eleitoral sira hodi hatudu sira nia identifikasaun no kredensial ne'ebé STAE emiti para sira bele akompaña prosesu eleitoral ne'ebé la'o hela;
- e. Husu ba profesional orgaun komunikasaun sosial sira hodi hatudu sira nia identifikasaun no kredensial ne'ebé STAE emiti para sira bele halo kobertura jornalística ba prosesu eleitoral ne'ebé la'o hela;
- f. Dezempeña mos funsaun hirak ne'ebé maka lei, regulamentu haruka ka superior determina mas la'os tok funsaun hirak ne'ebé maka atribui ona ba orgaun seluk.

Artigu 23º Inkompatibilidade

Presidente Repúblika, deputadu sira, membru governu sira, funsionáriu sira, ajente no traballador sira administrasaun públika Repúblika Demokratika Timor-Leste nian, membru FALINTIL-Forsa Defeza Timor-Leste no Polísia Nasional Timor-Leste sira, majistradu judisial sira, Ministériu Públiku, autoridade relijioza sira, membru CNE sira, kandidatu no fiskais kandidatura sira, sira ne'e hotu labale sai nudar oficial eleitoral;

Artigu 24º Substituisaun Oficial Eleitoral

1. Karik iha loron eleisaun no minutu tolu-nulu antes oras markada ba eleisaun atu hahú maka oficial eleitoral sira ne'ebé Diretor Geral STAE nian nomeia tiha ona la marka prezensa iha estasaun votu, presidente sentru votasaun nian tenki komunika kedas buat ne'e ba Diretor Munisipal STAE nian.
2. Diretor Munisipal STAE nian bele nomeia fali eleitor kualker ida ne'ebé iha kapasidade rekoñesida, hodi troka oficial ida ne'ebé falta, liu husi konkordansia maioria oficial eleitoral sira ne'ebé maka marka prezensa iha fatin votasaun ne'e.
3. Karik presidente sentru votasaun auzente, sekretáriu primeira estasaun votu husi sentru ne'e rasik maka sei troka nia, no nia rasik bele troka husi oficial verifikador identifikasaun ne'ebé maka maioria husi oficial eleitor estasaun votu ida ne'e nian hili rasik.
4. Kuandu troka ona, oficial eleitoral sira ne'ebé maka falta ne'e la konta ona, no presidente sentru votasaun tenki komunika kedas sira nian naran ba STAE.
5. Substituisaun hotu-hotu tenki hakerek hotu kedas iha ata.

Artigu 25º Manutensaun Orden no Disiplina

Presidente kada sentru votasaun ho sekretáriu estasaun votu nian, ho apoiu husi oficial eleitoral sira, halo providensia nesesária atu bele garante manutensaun orden no disiplina durante operasaun eleitoral atu nune'e bele salvaguarda liberdade votu no nia ezersisiu regular.

Seksaun II Buletin votu

Artigu 26º Definisaun

Buletin votu iha nia forma retangular, ho dimensaun apropiada atu nune'e bele tau kandidatura sira hotu-hotu iha ne'ebá no cetak/impressa iha surat-tahan mutin, kaber no la transparente.

Artigu 27º
Elementu integrante sira

1. Iha kada buletin votu sei cetak/tau kandidatu sira nia naran, kor, fotografia no símbulu ne'ebé kandidatu sira rasik eskolla, sei tau iha pozisaun orizontal, tuir orden sorteiu, tuir modelu ne'ebé maka STAE apresenta no ho aprovasaun CNE nian.
2. Partidu politiku ka koligasaun partidaria sira nia naran sei hakerek orizontalmente iha buletin votu, tuir sorteiu ne'ebé STJ realiza, no sei tau hotu iha buletin oin, kada fotografia nomós kuadradu oan ida-idak, iha fatin ne'ebé eleitor sira sei manifesta sira nia sentidu votu.

Artigu 28.º
Transporta buletin votu

1. Buletin votu sira sei transporta ba sentru votasaun ne'ebé lokaliza iha rai-liur/estranjeiru, liu husi mala diplomátika.
2. Too loron sanulu-resin-lima antes loron eleisaun nian, Ministeriu Negósiu Estranjeiru no Kooperasan sei hatama ba Diretor Jeral STAE, ho kuñesimentu CNE nian, lista nominal husi diplomata sira no funsionariu konsular sira ne'ebé maka iha kondisaun sira atu aseguara transporte buletin votu ba sentru votasaun sira ne'ebé lokaliza iha estranjeiru.
3. Diretor Jeral STAE dezigna diplomata ka funsionáriu konsular ne'ebé maka sei responsável ba transporta buletin votu no material eleisaun hotu-hotu too iha sentru votasaun sira ne'ebé instala iha estranjeiru, ho baze iha lista ne'ebé MNEC hatama no depois de rona tiha CNE.
4. Remata tiha operasaun votasaun, kontajen no apuramentu rezultadu sira ne'ebé realiza iha estranjeiru, funsioáriu sira hirak ne'ebé, ba efeitu ida ne'e, dezigna tuir termu n.º 3, sei aseguara transporta dokumentu sira hotu-hotu ligadu ba prosesu eleitoral ninian husi estranjeiru fila mai Dili hanesan ata estasaun votu no sentru votasaun, buletin votu sira ne'ebé utilizado no la utilizadu nomós reklamasan no rekursu sira ne'ebé maka apresenta.
5. Transporta no distribuisaun husi material sira ne'ebé temi iha número ida liu ba ne'e sei supervizona husi CNE.

Kapítulu III
Prosesu votasaun

Seksaun I
Regra sira Jeral

Artigu 29º
Direitu votu

1. Sidadaun hotu-hotu ho tinan sanulu-resin-hitu ona iha direitu atu vota no eleitu.
2. Ezersisiu direitu sufrájiu ne'e pesoal no konstitui dever síviku.
3. Direitu votu ne'e ezerse direta, pessoal no prezensialmente husi eleitor ida-idak
4. Eleitor ida, so bele vota dala ida deit.

5. Ezersisiu direitu votu ne'e depende ba inskrisaun prévia eleitor ne'e rasik iha resenseamentu eleitoral.

Artigu 30° Eleitor iha Servisu

1. Funsionáriu no ajente sira estadu, membru sira polisia nasional Timor-Leste, membru sira F-FDTL, no traballador sira iha misaun diplomátika sira no misaun observaun eleitoral ne'ebé maka presta sira nia servisu iha loron eleisaun, iha ámbitu prosesu eleitoral nian, sei ezerse sira nia direitu votu iha sentru votasaun ne'ebé besik liu ba fatin ne'ebé sira presta sira nia servisu.
2. Entidade sira ne'ebé maka emprega funsionáriu públiku sira, ajente administrasaun públika no traballador sira ne'ebe ligadu ba número anterior, tenki envia ba STAE, até vinte dias husi data nebé markada ba eleisaun, relasaun nominal kompleta husi kada funsionáriu sira ka ajente sira administrasaun públika ne'ebé presta servisu iha ámbitu prosesu eleitoral no identifika fatin ne'ebé servisu ne'e sei realiza.
3. Iha sentru votasaun, sei iha mos lista ida ba eleitor sira ne'ebé maka inskritu iha unidade jeográfika resenseamentu eleitoral seluk maibé bele ezerse direitu votu iha sentru votasaun ida ne'e, bazeia ba saida maka temi iha número anterior.

Artigu 31° Liberdade no Segredu Votu

1. Votu ne'e livre no labele obriga ema ida hodi fo-hatene nia votu, iha sentru votasaun nia laran ka liur, iha fatin ne'ebé nia vota ka atu ba vota.
2. Pozisaun kabina votu nian tenki tau iha fatin ne'ebé bele asegura segredu votu eleitor sira nian.

Artigu 32° Eleitor sira ne'ebé labele haree ka iha defisiensia ruma

1. Sidadaun sira ne'ebé matan-ladiak ka ida defisiensia ruma ne'ebé la permite sira atu vota mesak, bele ezerse sira nia direitu votu, akompañia husi sidadaun eleitor ruma ne'ebé sira rasik maka hili.
2. Ida ne'ebé akompañia iha obligasaun atu mantén sijilu kona ba sentidu votu eleitor matan-at ka deficiente ne'e nian.
3. Sekretáriu estasaun votu nian haree lolós hodi sertifika katak akompañante ne'e eleitor rasik maka hili livremente hodi akompañia nia ba ezerse nia direitu vota, ho prezensa husi representante partidu polítiku sira.
4. Karik halo konkluziun katak, eskolla ba akompañante ne'e la'os livre, sekretariu estasaun votu nian tenki kria kondisaun atu nune'e eleitor bele hili fali sidadaun eleitor seluk ida ne'ebé bele akompañia ema ne'e iha nia ezersisiu direitu votu.
5. Iha situsaun sira ne'ebé maka sekretáriu estasaun votu nian sei duvida hela autenticidade sirkunstansia ka faktu ne'ebé refere iha nº 1 hodi permite ezersisiu direitu votu akompañadu, eleitor ne'e tenki apresenta komprovotativu médiku ne'ebé sertifika faktu ka sirkunstansia ne'ebé impede nia atu halo mesak nia ezersisiu direitu votu.

Artigu 33° Kontinuidade husi operasaun eleitoral

Votasaun sei la'ó sein interupsaun tuir oráriu funsionamentu ne'ebé previstu iha artigu 7º

Artigu 34º

Interupsaun operasaun eleitoral

1. Sei labele hala'ó votasaun iha kualker sentru votasaun no estasaun votu ruma kuandu:
 - a. Votasaun ne'e labele organiza, akontese problema ruma ne'ebé interompe tiha operasaun eleitoral liu husi oras rua, ou akontese dezastre-bot/kalamidade bot ruma iha loron ne'ebé markadu tiha ona ba eleisaun;
 - b. Akontese dezastre-bot/kalamidade ruma loron tolu antes loron eleisaun.
2. Kuandu labele duni hala'ó eleisaun, tenki komunika kedas ba delegadu CNE nian ne'ebé marka prezensa iha lokal, depois de hatene lolos tiha akontesimentu husi kualker faktu ne'ebé temi iha número anterior.
3. Kuandu votasaun interompe tiha liu husi óras rua signifika estasaun votu ne'e tenki taka ona no entrega fila-fali ona urnas seladas ne'ebé hetan ona votu sira balun ba assembleia apuramentu munisipal ka rejional.
4. Iha kazu sira ne'ebé previstu iha alínea a) husi nº 1, sei fo hatene eleitor sira atu bele ba vota fali iha sentru votasaun no estasaun votu ne'ebé besik liu.
5. Iha kazu ne'ebé previstu iha alínea b) nº 1, STAE, ho akordu delegasaun CNE ne'ebé marka prezensa iha lokal ne'e, transfere lokalizasaun sentru votasaun no estasaun votu ne'e ba fatin ne'ebé siguru liu.
6. Kuandu situasaun sira ne'ebé prevista iha n.º 1 verifika duni iha sentru votasaun no estasaun votu sira ne'ebé instala iha servisu konsular ka iha misaun dilomátika sira, iha estranjeiru, dirijente máximu husi servisu konsular ka misaun diplomátika sira sei informa kedas ba CNE kona ba kauza sira ne'ebé maka halo eleisaun labele realiza.
7. Iha kazu sira hirak ne'ebé maka prevé iha número anterior, eleisaun sei hala'ó fali iha loron hitu tuir mai, depois de data ida ne'ebé maka hili tiha ona atu hala'ó votasaun ne'ebé maka la too realiza ne'e.

Seksaun II

Operasaun preliminar votasaun

Artigu 35.º

Lokalizasaun sentru votasaun

1. Sentru votasaun no estasaun votu ida-idak lokaliza iha unidade jeográfika sira ne'ebé estabelese ona hodi halo resenseamentu eleitoral.
2. Sentru votasaun no estasaun votu sira, lokaliza diak liu ne'e iha fatin sira ne'ebé maka iha liu kondisaun sira siguransa hodi hala'ó prosesu ne'e.
3. Labele instala sentru votasaun iha:
 - a) Unidade polísia nian;

- b) Unidade militar;
- c) Xefe tradisional sira nia hela-fatin/rezidencia
- d) Hela-fatin/rezidencia privada;
- e) Edifisiu sira ne'ebe nudar propriedade partidu ruma nian;
- f) Fatin kultu ka destinadu ba kultu;
- g) Hospital ka kualker edificisiu ligadu ba servisu saude nian.

Artigu 36°
Material servisu nian iha kada estasaun votu

STAE sei asegura iha kada sentru votasaun no estasaun votu ida-idak, sei iha forneshimentu material eleitoral ne'ebé presiza hodi hala'ó sufrájiu, conforme Anexu I regulamentu ida ne'e ninian, ne'ebe halo parte iha efeitus legais hotu-hotu.

Artigu 37°
Operasaun preliminar sira

1. Iha tuku nen dader iha loron eleisaun nian, presidente sentru votasaun konfirma identidade sekretáriu estasaun votu sira no fiskais sira ne'ebé partidu politiku ka koligasaun partidaria sira indika ba eleisaun Parlamentar nian atu akompañia operasaun eleitoral ne'ebé hala'ó iha sentru votasaun.
2. Iha tuku nen liu minutu sanulu-resin-lima, sekretáriu estasaun votu sira sei halo identifikasaun ba ofisial eleitoral sira husi estasaun votu ida-idak nomós fiskais sira ne'ebé partidu politiku ka koligasaun partidaria sira hili ba eleisaun Parlamentar ne'ebé halo sira nian funsaun iha ámbitu ida ne'e nian.
3. Iha tuku nen liu minutu tolu-nulu, sekretariu estasaun votu informa ba presidente sentru votasaun kona ba ofisial eleitoral sira ne'ebé maka la mosu mai fatin votasaun atu halo identifikasaun no hahú sira nia funsaun.
4. Iha tuku nen liu minutu tolu-nulu-resin-lima presidente sentru votasaun informa ba Diretor Municipal STAE katak eziste ofisial eleitoral balun maka falta no husu para bele substitui sira.
5. Iha tuku nen liu minutu hat-nulu-resin-lima, sekretariu estasaun votu no ofisial eleitoral, iha fiskais kandidatura sira no observador sira eleitoral sira nia oin, komesa:
 - a. Verifika kabina votu nian;
 - b. Verifika no hatudu urna votu sira nia laran ba ema;
 - c. Tau selu ba urna eleitoral no lée ho lian bot número husi selu siguransa ne'e;
 - d. Rejista tiha número selu siguransa ne'e iha ata operasaun eleitoral;
 - e. Konta no verifika karimbu sira ne'ebé simu;
 - f. Konta buletin votu sira ne'ebé simu;
 - g. Hakerek iha ata operasaun eleitoral número buletin votu ne'ebé simu ona;
 - h. Afixa iha edital, naran husi ofisial eleitoral sira ne'ebé servisu iha estasaun votu;
 - i. Hakerek hotu iha ata operasaun eleitoral, kualker iregularidade ka insidente sira balun ne'ebé verifika nomós protestu ka reklamasaun sira ne'ebé apresenta iha operasaun preliminar no desizaun sira ne'ebé maka ofisial eleitoral sira halo sobre reklamasaun ka protestu sira ne'e.

Seksaun III

Operasaun votasaun
Artigu 38º
Orden votasaun

1. Sein prejuizu husi situasaun hirak ne'ebé maka prevé iha artigu 34º, presidente sentru votasaun nian deklarara loke sentru votasaun iha tuku hitu dader iha loron ne'ebé hili tiha ona hodi hala'ó eleisaun no sekretáriu estasaun votu sira mos sei halo hanesan, iha sira ida-idak nian estasaun.
2. Depois deklarasaun ne'ebé prevé iha número anterior, ofisial eleitoral sira ezerse sira ida-idak nia direitu votu iha estasaun ne'ebé sira ida-idak hala'ó sira nia funsaun bá no tuir termu sira ne'ebé maka prevé iha regulamentu ida ne'e.
3. Kuandu prosesu votasaun ba ofisial eleitoral sira remata ona, eleitor sira mos bele hahú ezerse ona sira nia direitu votu tuir sé maka too uluk, sein prejudika fali orden presedensia ne'ebé maka prevé ona iha artigu 5.
4. Para bele hetan asesu ba estasaun votu hodi ezerse ida-idak nia direitu sufrajiu, eleitor sira sei forma iha liña, tuir instrusaun ne'ebé maka ofisial kontrolador liña nian sei fó.
5. Eleitor sira hanesan tuir mai ne'e, goza prioridade atu ezerse direitu votu no tuir orden presedensia:
 - a. Eleitor sira ne'ebé isin rua
 - b. Eleitor sira ne'ebé ho idade bot liu ona tinan nen-nulu-resin-lima;
 - c. Eleitor sira ne'ebé maka hatudu tipu debilidade ka inkapasidade fízika;
 - d. Eleitor sira ne'ebé maka hiti ka kous oan nurak;
 - e. Funsionariu, ajente no traballador administrasaun públika ne'ebé maka hala'ó hela sira nia knar hodi organiza no realiza prosesu eleitoral.

Artigu 39º

Prosedimentu hodi identifika eleitor sira

1. Kuandu tama ona iha estasaun votu, eleitor sei entrega ba ofisial kontrolador fila, kualker dispozitivu movel ne'ebé sira iha ne'ebé bele uza hodi kapta imajen.
2. Depois halo tuir saída maka prevé iha número anterior, eleitor apresenta-an iha ofisial verifikador nia oin hodi identifika-an no hatudu kartaun eleitoral, ka karik laiha bele mós hatudu billete identidade ka passaporte timor-nian.
3. Ofisial ne'ebé verifika identifikasaun, depois kumpri tiha formalidade ne'ebé prevé iha número anterior, sei verifika mos se eleitor iha ona tinan sanulu-resin-hitu iha loron votasaun nian, se eleitor nia liman-fuan indikador liman-los nian tau ona tinta indelevel ka lae, no eleitor nia naran iha ona lista eleitor inskritu iha resenseamentu eleitoral husi unidade jeográfika resenseamentu ne'ebé sentru votasaun ne'e instaladu ba ka lae .
4. Iha kazu sira ne'ebé maka eleitor identifika-an ona tuir termu da lei ne'ebé prevé iha número 2, nia naran iha lista hanesan ne'ebé hateten iha nº 3, halo tiha ona tinan sanulu resin hitu no nia isin parte leten seidauk marka ho tinta indelevel, ofisial verifikador identifikasaun sei fo tiha sinal iha eleitor nia naran iha lista liu husi dada tiha trasu ida iha naran leten no enkamiña nia ba ofisial kontrolador buletin votu nian.
5. Kuandu eleitor identifika ona ho kartaun eleitoral ne'ebé indika katak, nia naran inskritu tiha ona iha resenseamentu eleitoral iha unidade jeográfika resenseamentu eleitoral ne'ebé maka sentru votasaun ne'e instala bá, ofisial verifikador sei inklui eleitor ne'e nia naran iha lista adisional eleitor nian.
6. Sei tau iha lista adisional eleitor, ne'ebé temi iha número anterior, eleitor sira nia informasaun hanesan tuir mai ne'e:
 - a. Eleitor ne'e nia naran;
 - b. Número kartaun eleitoral;

- c. Hela fatin kompletu;
 - d. Eleitor nia assinatura.
7. Iha situasaun ne'ebé maka eleitor la konsege prova nia identidade, nein nia inskrisaun no resenseamentu eleitoral iha unidade jeográfika resenseamentu eleitoral ne'ebé maka sentru votasaun ne'e instala bá ke nia hakarak ezerse nia direitu votu, ofisial verifikador identifikasaun sei enkamiña nia hodi sai husi estasaun votu.

Artigu 40º

Prosedimentu entrega buletin votu no votasaun

1. Konklui tiha prosedimentu sira hodi identifika eleitor, tuir termu artigu anterior nian, no la aplika iha nº 6, ofisial kontrolador buletin votu sei entrega buletin votu ba eleitor.
2. Buletin votu ne'ebé entrega ba eleitor ne'e tenki assina no tidin karimbu tiha kedas husi ofisial kontrolador buletin votu.
3. Depois simu tiha buletin votu, eleitor sei tama ba kabina votu nian ne'ebé livre no iha ne'ebá sei ezerse nia direitu sufrájiu.
4. Sidadaun eleitor sei marka sira nia eskolla liu husi koloka sinal ida ka halo kuak iha kuadradu mutin ne'ebé tau iha liña ke koresponde kedas ho kandidatura ne'ebé maka eleitor hakarak vota bá.
5. Tuir mai, eleitor sei dobra buletin votu, ho parte impressa/cetak nian fila ba laran, antes hatama ba urna/kaixa votasaun nia laran.
6. Iha situasaun ne'ebé maka eleitor halo sala ka estraga tiha buletin votu:
 - a. Eleitor bele ba ofisial kontrolador buletin votu no husu para troka tiha buletin ne'e;
 - b. Ofisial kontrolador buletin votu sei husu autorizasaun husi sekretáriu estasaun votu nian atu bele troka buletin ne'ebé at tiha ona ho buletin foun;
 - c. Sekretáriu estasaun votu nian autoriza substituisaun buletin votu ne'ebé at ho tau karimbu ida ne'ebé hateten "cancelado" iha lolon no ho assinatura.
 - d. Depois de autoriza tiha hodi troka buletin votu ne'ebé at, ofisial kontrolador buletin votu sei entrega buletin votu foun ba eleitor ne'ebé husu halo substituisaun buletin votu ne'ebé at tiha ona ne'e, atu nune'e nia bele ba iha kabina votu mamuk ida hodi ezerse nia direitu atu vota.
7. Buletin votu sei introduz iha urna eleitoral iha ofisial kontrolador urna eleitoral nia oin.
8. Depois de eleitor hatama tiha nia votu ba urna eleitoral, nia sei la'ó ba hasoru ofisial kontrolador aplikasaun tinta indelevel ne'ebé aplika iha termu ne'ebé prevé iha artigu 21º.
9. Konklui tiha operasaun tau tinta indelevel, eleitor sei sai husi estasaun votu, ho ida ne'e nia bele simu hikas fali dispozitivu kapta imajen nian ne'ebé maka nia husik hela iha kontrolador fila.

Artigu 41º

Dúvida, reklamasaun no protestu sira

1. Kualker eleitor ka fiskal kandidatura, iha período funsionamentu estasaun votu, bele hatoo dúvida, protestu no reklamasaun sira kona ba operasaun eleitoral.
2. Dúvida, reklamasaun no protestu sira hirak ne'ebé apresenta durante votasaun ka depois taka votasaun sei hetan análise kedas husi ofisial eleitoral sira, no karik sira prezisa, sira mos bele konsulta ho STAE.

3. Reklamasauñ hirak ne'ebé apresenta, tuir número anterior, sei submete ba votasaun husi ofisial eleitoral no konsidera nudar deferidu sira karik hetan votu favoravel husi pelu menus sira nain nen.
4. Deliberasaun hotu tenki komunika kedas ba reklamante sira, karik entende katak, bele hatoo reklamasauñ sira ne'e ba representante CNE nian, ho nuné atu bele entrega kedas iha sentru votasaun ka estasaun votu ne'ebé maka kestaun ne'e foti, reklamasauñ ne'e tenki akompañá mos ho dokumentasaun hotu ne'ebé iha ligasaun ho sentru votasaun ne'e nian.
5. Ba efeito sira husi número anterior, CNE sei decide iha prazu óras hitunulu-resin-rua nia laran.
6. Husi desizaun sira ne'ebé CNE halo, bele apresenta rekursu ba STJ iha prazu oras hatnulu-resin-walu nia laran.
7. STJ maka decide kona ba rekursu sira hirak ne'ebé maka apresenta ona ba nia iha prazu oras hatnulu-resin-walu nia laran.
8. Reklamasauñ no rekursu sira ne'ebé dirije ba ida-idak, CNE no STJ, kona ba operasaun votasaun, kontajen votu sira no apuramentu rezultadu sira ne'ebé realiza iha sentru votasaun no estasaun votu hirak ne'ebé funsiona iha estranjeiru, sei apresenta ba representante sira diplomátiku ka konsular ne'ebé graduadu liu ke halo hela funsaun iha sentru votasaun no estasaun votu ne'e.
9. CNE no STJ kria konta e-mail ida hodi simu reklamasauñ no rekursu sira ne'ebé hatoo ba sira kona ba operasaun votasaun, kontajen votu sira no apuramentu rezultadu sira ne'ebé hala'ó iha estranjeiru.
10. Nune'e mos, STJ kria email ida hodi simu rekursu sira sira ne'e maka apresenta ba STJ kona ba operasaun votasaun, kontajen votu sira no apuramentuu rezultadu sira ne'ebé hala'ó iha estranjeiru.
11. Enderesu email sira ne'ebé temi iha número anterior, tenki fó hatene ba STAE too loron sanulu-resin-lima antes loron ne'ebé hili ona hodi realiza eleisaun.

Artigu 42º **Enseramentu votasaun**

1. Iha loron eleisaun, eleitor sira so bele hatan atu tama ba forma iha liña hodi ba vota to tuku sanulu-resin-lima loraik deit.
2. Depois tuku sanulu-resin-lima, só eleitor sira ne'ebé maka forma nanis tiha ona iha liña laran iha estasaun votu ne'e maka bele ba vota, ida ne'e ofisial kontrolador liña maka tenki verifica no relata ba sekretáriu estasaun votu nian.
3. Sekretáriu estasaun votu nian sei deklara katak votasaun taka ona kuandu eleitor inskritu sira vota hotu ona ka, depois tuku sanulu-resin-lima loraik, kuandu eleitor sira ne'ebé maka forma hela iha liña laran too óras ne'e, vota hotu ona.

Artigu 43º **Enseramento operasaun iha estasaun votu**

1. Kuandu deklara katak votasaun taka ona no dúvida sira, protestu no reklamasauñ sira rezolve hotu ona, Sekretariu estasaun votu nian sei:
 - a. Halo kontajen ba buletin votu sira ne'ebé la uza, rejista sira nia numeru ida-idak iha ata estasaun votu nian, sei la uza tan buletin sira ne'e ho hatur tiha karimbu ne'ebé hateten, "La Uza", no tuir mai

- hatama tiha sira hotu ba iha envelope ne'ebé propiu duni ba buletin hirak ne'ebé maka la too uza;
- b. Halo kontajen ba buletin votu sira ne'ebé kanseladu, rejista sira nia numeru ida-idak iha ata estasaun votu nian, sei la uza tan buletin sira ne'e ho hatur tiha karimbu ne'ebé hateten, "cancelado", no tuir mai hatama tiha sira hotu ba iha envelope ne'ebé propiu duni ba buletin hirak ne'ebé kanseladu nian;
 - c. Halo kontajen ba buletin votu sira ne'ebé abandonado, rejista sira nia numeru ida-idak iha ata estasaun votu nian, sei la uza tan buletin sira ne'e ho hatur tiha karimbu ne'ebé hateten, "abandonado", no tuir mai hatama tiha sira hotu ba iha envelope ne'ebé propiu duni ba buletin hirak ne'ebé maka abandonadu nian;
 - d. Halo kontajen ba número eleitor hirak ne'ebé maka assinaladu iha lista eleitor sira nian no iha lista adisional eleitor ne'ebé vota iha estasaun votu ida ne'e, no hakerek tiha número sira ne'e iha ata estasaun votu sira nian.
2. Sekretáriu estasaun votu nian, ho ajuda oficial eleitor sira, koloka urna, ata funcionamentu estasaun votu no material sira ne'ebé refere iha nº 2 husi artigu ida ne'e iha fatin ne'ebé eskollidu ona husi presidente sentru votasaun nian atu nune'e bele hahú halo kontajen ba votu sira no apuramentu inisial ba rezultadu sira eleitoral.
 3. Ba efeito sira ne'ebé maka temi iha número anterior, presidente sentru votasaun eskolla fatin ne'ebé apropiadu no espasu iha sentru votasaun ne'e rasik, atu nune'e bele garante katak fiskais kandidatura sira, observador sira eleitoral no profesional komunikasaun sosial sira bele akompaña servisu kontajen votu sira no apuramentu inisial rezultadu sira eleitoral.

Kapítulu IV Prosesu kontajen

Seksaun I Klasifikasaun votu sira

Artigu 44º Klasifikasaun votu sira

Para bele halo kontajen votu sira no apuramentu rezultadu sira, sei konsidera nudar:

- a. Validu sira, buletin votu ne'ebé maka hasai husi urna eleitoral mai, ne'ebé hetan ona assinatura no karimbu husi oficial kontrolador buletin votu, no hatudu momós kedas sentidu votu kada eleitor ninian, maibé la revela identidade kada autor ninian;
- b. Branku sira, buletin votu ne'ebé maka hasai husi urna eleitoral mai, ne'ebé hetan ona assinatura no karimbu husi oficial kontrolador buletin votu, maibé la hatudu tok kualker tipu de sinal ida;
- c. Nulo sira, buletin votu ne'ebé maka hasai husi urna eleitoral mai, ne'ebé hetan ona assinatura no karimbu husi oficial kontrolador buletin votu, iha ona sinal ka tu-kuak ona iha ne'ebá maibé la hatudu lolós sentidu eskolla husi kada eleitor, atu nune'e bele identifika buletin votu ne'e, ka indika eskolla ba kandidatura ida ne'ebé maka deziste ka hakiduk tiha ona husi prosesu eleisaun, ka halo tiha korte, dezeño ka nakles ruma, ka hakerek fali lia fuan balun iha ne'ebá;
- d. Rejeitadu sira, buletin votu ne'ebé maka hasai husi urna eleitoral mai, ne'ebé laiha assinatura no karimbu husi oficial kontrolador buletin votu;
- e. Kanseladu sira, buletin votu ne'ebé maka entrega fila fali ba oficial eleitoral, hodi troka fali ho buletin votu foun, tamba eleitor halo tiha sala, wainhira nia

- indika nia eskolla iha buletin ne'e ka buletin ne'e estraga tiha involuntariamente;
- f. Abandonado sira, buletin votu hirak ne'ebé maka hetan fali soe hela iha estasaun votu.

Seksaun II

Kontajen votu sira no apuramentu rezultadu eleitoral sira

Artigu 45º

Resepsaun no abertura urna sira nian

1. Urna sira sei entrega husi sekretariu estasaun votu, akompañadu husi oficial eleitoral sira no simu husi presidente sentru votasaun nian, iha fatin ne'ebé maka defini antes kedas ona;
2. Presidente sentru votasaun, depois de simu tiha urna eleitoral sira ne'e, sei lé ho lian bot, número husi selu siguransa nian no husu ba fiskais kandidatura sira atu bele konfirma número sira ne'e.
3. Kuandu remata tiha konfirmasaun ba número selu sira siguransa nian, presidente sentru votasaun, iha prezensa oficial eleitoral, fiskais kandidatura, observador sira eleitoral no profesional komunikasaun sosial sira ho mos sidadaun hotu ne'ebé maka marka prezensa iha fatin ne'e, komesa loke ona urna eleitoral.

Artigu 46º

Kontajen Votu sira

1. Depois loke tiha urna eleitoral, presidente sentru votasaun komesa hasai buletin votu ne'ebé maka iha hela urna nia laran, dez dobra tiha buletin sira ne'e no koloka sira iha meza kontajen nia leten, ho parte kotuk fila ba leten atu bele haree se buletin sira ne'e hetan hotu ona assinatura no karimbu husi oficial kontrolador buletin votu nian ka lae.
2. Presidente sentru votasaun nian sei rejista iha ata rezultadu sentru votasaun nian, número buletin votu ne'ebé maka hasai husi urna laran mai no assinadu no karimbadu lolos ona husi oficial kontrolador buletin votu nian.
3. Buletin votu sira ne'ebé maka iha hela urna eleitoral nia laran maibé laiha assinatura no karimbu husi oficial kontrolador buletin votu nian, sei separa tiha husi buletin votu sira seluk, depois tau tiha karimbu nudar rejeitadu sira, sei lé no konta ho lian-boot husi presidente sentru votasaun nian, no nia número sei rejista iha ata rezultadu husi sentru votasaun nian.
4. Buletin votu ne'ebé sai husi urna mai mas seidak tidin ho karimbu ne'ebé dehan "rejeitadu", sei kahur hamutuk tiha ho buletin votu ho karakteristikasira hanesan ne'ebé mai husi estasaun votu sira seluk no depois sei agrupa hamutuk iha lote lima-nulu ida.
5. Halo hotu tiha operasaun ne'ebé maka temi iha número anterior, presidente sentru votasaun nian sei lé ho lian makás, sentidu votu ne'ebé maka hatudu iha kada buletin no hatudu buletin nia oin ba ema hotu ne'ebé marka prezensa iha ne'ebá bele haree no sei tau hamutuk tuir lote ne'ebé koresponde ba kandidatu sira ida-idak.
6. Buletin votu sira ne'ebé maka klasifikadu nudar branku ka núlo, sei tau hamutuk iha lote ketak.
7. Buletin votu sira ne'ebé maka reklamadu, sei tau iha nia fatin rasik.
8. Dúvida, protestu no reklamasau sira ne'ebé maka apresenta iha operasaun kontajen no apuramentu rezultadu sira, sei aplika regra sira ne'ebé prevé iha artigu 40º, ho adaptasaun nesessária.
9. Versaun orijinal husi reklamasau sira sei tau hamutuk ho buletin votu sira reklamadu iha envelope "buletin votu sira reklamadu" nian.

10. Rezultadu husi kontajen votu sira no apuramentu rezultadu sira nian tenki transmitidu kedas via elektronika ba STAE ne'ebé maka sei fo hatene mos ba CNE.

Artigu 47º Prixe ata

1. Konta tiha no konfere tiha votu sira validu ba kada kandidatura, rezultadu sira sira ne'e sei anota hotu iha ata rezultadu nian iha sentru votasaun no buletin votu sira ne'ebé maka identifikadu nudar "votu sira válidu", fahe ketak-ketak tiha tuir kada kandidatura ne'ebé maka konkore ba eleisaun.
2. Karimbu tiha, konta tiha no konfere tiha votu sira branku sira, rezultadu sira sira ne'e tenki anota kedas iha ata rezultadu sentru votasaun no buletin sira sei hatama hamutuk iha envelope ne'ebé identifikadu nudar "votu branku" nian.
3. Karimbu tiha, konta tiha no konfere tiha votu sira nulo sira, karik iha, rezultadu sira husi ida ne'e sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu nulo" nian.
4. Karimbu tiha, konta tiha no konfere tiha votu sira reklamadu sira, karik iha, rezultadu sira husi ida ne'e sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu reklamadu" nian.
5. Karimbu tiha, konta tiha no konfere tiha votu sira rejeitadu sira, karik iha, rezultadu sira husi ida ne'e sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu rejeitadu" nian.
6. Karimbu tiha, konta tiha no konfere tiha votu sira kanseladu sira, karik iha, rezultadu sira husi ida ne'e sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu kanseladu" nian.
7. Karimbu tiha, konta tiha no konfere tiha votu sira abandonadu sira, karik iha, rezultadu sira husi ida ne'e sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu abandonadu" nian.
8. Karimbu tiha, konta tiha no konfere tiha buletin votu sira la utilizadu sira, rezultadu sira ho número de serie sei anota tiha iha ata rezultadu sira sentru votasaun nian no buletin sira sei hatama hamutuk iha envelope ne'ebé identifikadu nudar "votu la utilizadu/la uza" nian.
9. Envelope sira tenki taka metin e tenki diskrimina kedas número buletin votu ne'ebé maka konten sentru votasaun ida-idak no estasaun de votu sira ho kedas sira ida-idak nia kódigo korespondente no temi mos unidade jeográfika ne'ebé maka sira pertense bá.
10. Iha ata mos sei tau hotu número selu siguransa kada urna nian, fatin no kódigo kada estasaun votu, oráriu loke no taka sentru votasaun, ofisial eleitoral no fiskais kandidatura sira nia naran, nomós protestu no reklamasauun ne'ebé apresenta no deliberaun ne'ebé foti.
11. Konta tiha formuláriu sira no reklamasauun ne'ebé apresenta, karik eziste, numeru reklamasauun sira ne'e tenki anota tiha iha ata rezultadu sentru votasaun nian.
12. Ata operasaun kontajen no apuramentu rezultadu sira ne'ebé hala'o iha estranjeiru, nune'e mos ho votu sira hirak ne'ebé reklamadu sira, sei entrega, iha suporte fiziku, iha assembleia apuramentu nasional, iha prazu máximu óras hitunulu-resin-rua nia laran, konta husi momentu ne'ebé maka operasaun kontajen no apuramentu rezultadu eleisaun nian remata.

Artigu 48º
Enseramentu operasaun iha sentru votasaun

1. Anota iha ata operasaun eleitoral, resultados kontajen, presidente sentru votasaun no sekretariu husi estasaun votu sira obrigatoriamente tenki assina ata ne'e.
2. Ba kada sentru votasaun, so admite deit fiskal ida-ida reprezenta kada kandidatu atu assina ata operasaun eleitoral.
3. Ba efeito numeru anterior nian, karik fiskais kandidatura sira nain ida ka liu maka la assina ata operasaun eleitoral, ida ne'e sei la signifika katak ata no operasaun eleitoral ne'e la vale.
4. Sei hatama ba urna no lé ho lian makás, número votu sira ne'ebé tau iha envelope sira tuir mai ne'e:
 - a. Envelope "votu sira válido", "votu sira núlo", "votu sira branku", "votu sira reklamadu", "votu sira rejeitadu", "buletin votu sira la uza", "buletin votu sira kanseladu" no "buletin votu sira abandonadu";
 - b. Envelope ida ba ata operasaun eleitoral, deklarasaun komporimisu, lista prezensa husi ofisial eleitoral, folla observasaun, lista eleitor sira, lista adisional eleitor no lista eleitor misaun servisu;
 - c. Selu sira ne'ebé la uza no karimbu.
5. Urna sira, depois hatama tiha material ba laran, sei tau tiha selu no nudar responsabilidade presidente sentru votasaun nian, no kompete ba nia, iha kordenasaun ho representante diplomátiku ka konsular ne'ebé graduadu liu sei garante nia remessa ba servisu sentral STAE nian, tuir termu artigu 28 husi diploma ida ne'e, ho supervizaun CNE nian.
6. Konklui tiha prosesu kontajen no apuramentu rezultadu ne'ebé hala'o iha estrangeiru, presidente sentru votasaun nian sei dijitaliza tiha ata sira, no sei haruka tuir korreiu elektróniku/email, ba assembleia apuramentu nasional.
7. Ata sira ne'ebé maka temi iha número anterior, nune'e mos ho votu sira sira ne'ebé reklamadu, sei entrega, iha suporte fíziku, iha assembleia apuramentu nasional, iha prazu máximu óras hitunulu-resin-rua, konta husi momentu ne'ebé operasaun kontajen no apuramentu rezultadu eleitoral nian remata.
8. Estratu husi ata rezultadu iha sentru votasaun, ho indikasaun rezultadu apuramentu inisial, sei assina husi presidente sentru votasaun nian no sei taka iha fatin ne'ebé fasil atu haree iha edifísiu ne'ebé sentru votasaun funsiona bá.
9. Kabe ba presidente sentru votasaun atu garante katak kada fiskais kandidatura ne'ebé presente no kredensiadu hodi ezerse sira nia funsaun iha sentru votasaun ne'e, bele hetan asesu ba kópia ida husi ata rezultadu sentru votasaun nian, ho mós indikasaun rezultadu sira apuramentu inisial.

Artigu 49º
Assembleia apuramentu nasional

1. Iha prazu máximu oras hitunulu-resin-rua depois simu tiha ata apuramentu regional, apuramentu munisipal no apuramentu iha estrangeiru, CNE sei hahú halo apuramentu nasional, konfere tiha ata sira ne'e no deside, definitivamente, kona ba votu sira reklamadu, karik eziste, no kona mos ba reklamasau hotu-hotu ne'ebé maka apresenta.
2. Verifikasaun ba ata apuramentu ne'ebé temi iha número anterior, inklui mos possibilidade atu apresia no desidi ho maneira ida fundamentada, kona ba kualker inkonsistensia ka erru matemátika ruma ne'ebé verifika.
3. Sempre kuandu verifika retifikasaun ruma ba ata de operasaun apuramentu inisial ka intermédiu, tamba s mótivu sira no termu ne'ebé prevé iha número anterior, sei print-sai fali ezemplar foun husi ata refere, ne'ebé sei temi hotu

retifikasaun sira no fundamentu korespondente no sei tau hamutuk ho ata retifikada.

4. Konklui tiha operasaun no, iha prazu ne'ebé maka refere iha número 1 husi artigu ida ne'e, CNE sei elabora no taka iha nia sede ata rezultadu apuramentu nasional provizóriu nian.
5. Sei haruka kópia husi ata rezultadu apuramentu nasional provizóriu ba STAE no ba mós orgaun informasaun nasional sira.

Artigu 50º **Rekursu**

1. Kona ba rekursu ba apuramentu provizóriu rezultadu sira nasional ne'ebé CNE publika, bele apresenta iha prazu oras ruanulu-resin-hat nia laran depois rezultadu ne'e afixa/taka, ba koletivu STJ, ne'ebé sei notifika kedas interesadu sira no decide mos iha prazu hanesan.
2. Termina tiha prazu hodi halo rekursu nian maka laiha rekursu ruma apresenta, CNE sei hatama ba STJ ata apuramentu rezultadu sira nasional nian, akompaña mos ho ata apuramentu rejional, apuramentu munisipal no apuramentu iha estranjeiru, nomós kualker dokumentu ne'ebé konsidera nudar importante, no temi kedas iha ne'ebá katak laiha ida maka apresenta rekursu.

Artigu 51º **Proklamasaun rezultadu sira no validasaun eleisaun**

1. STJ, decide tiha rekursu tuir termu nº 1 husi artigu anterior ou prazu remata tiha mas laiha apresentasaun ba rekursu, sei analiza dokumentu sira ne'ebé maka CNE entrega, julga liu husi akórdaun ba validade eleisaun Parlamentar nian no, liu husi nia presidente, sei proklama rezultadu definitivu iha prazu máximu oras hitunulu-resin-rua nia laran, obrigatoriamente sei anuncia número total eleitor inskritu no votante sira, votu sira branku no votu sira núlo, número, ho ida-idak nia persentajen, votu sira hira maka atribui ba kada kandidatu, partidu politiku ka koligasaun partidaria sira eleitu nia naran, ka naran husi kandidatu nain rua ne'ebé maka sei ba konkore iha sigunda ronda.
2. STJ nia akórdaun sei hatama hodi publika iha Jornal da República ho kópia ida ba CNE no ida ba STAE.

Kapítulu V

Akompañamentu prosesu eleitoral

Seksaun I

Fiskalizasaun prosesu eleitoral

Artigu 52.º

Rekerimentu hodi hetan akreditasaun nudar fiskal kandidatura

1. Kandidatura hirak ne'ebé maka hakarak indika fiskais balun hodi akompaña eleisaun prezidensial, sei apresenta, liu husi hakerek, rekerimentu ida ba Diretor Jeral STAE, atu nune'e bele hasai kredensial ba fiskais sira, tamba laiha kredensial, sei labele asesu ba sentru votasaun no estasaun votu sira.
2. Rekerimentu ne'ebé maka refere ba número anterior, sei akompaña ho relasaun kompleta husi fiskais hanesan:

- a) Kada fiskal nia naran kompletu;
 - b) Fiskal ida-idak nia númeru eleitoral;
 - c) Fiskal ida-idak nia fotokópia billete identidade ka kartaun eleitoral;
 - d) Fotografia 2 tipu passport husi kada fiskal ne'ebé hakarak hetan akreditasaun.
3. Simu tiha rekerimentu sira ne'e, Diretor-Geral STAE sei decide kona ba rekerimentu sira ne'e, iha prazu óras hatnulu-resin-walu.
 4. Kredensial sira sei hasai iha loron lima nia laran depois apresenta pedidu, tuir termu husi n.º 1 norma ida ne'e nian.
 5. Ba desizaun indeferimentu/la aseitu pedidu sira, bele halo fali rekursu ba CNE, ne'ebé sei apresenta iha prazu óras ruanulu-resin-hat nia laran, konta husu notifikasaun ba desizaun ne'ebé foti kona ba rekerimentu akreditasaun ne'e.
 6. Simu tiha STAE nia defeza, ne'ebé maka apresenta iha prazu máximu óras ruanulu-resin-hat nia laran, CNE sei decide iha prazu máximu óras hatnulu-resin-walu nia laran no komunika nia desizaun ba fiskal kandidatura ne'e rasik, ba representante kandidatura nian ne'ebé maka fiskal ne'e indika ona no ba mós STAE.

Artigu 53.º

Kredensial fiskal eleitoral nian

1. Kredensial fiskal kandidatura sira nian sei iha informasaun sira hanesan tuir mai ne'e:
 - a) Fiskal nia naran kompletu;
 - b) Fiskal nia fotografia atualizada;
 - c) Fiskal nia númeru kartaun eleitoral;
 - d) Data emisaun kredensial;
 - e) Assinatura Diretor-Jeral STAE nian;
 - f) Holograma ho emblema STAE nian.
2. Modelu husi kredensial fiskal husi partidu pulítiku ka koligasaun partidu pulítiku sira ne'e inklui iha Aneksu II husi dekretu ida ne'e, ne'ebe hanesan parte integral.

Artigu 54.º

Fiskais eleitoral sira nia direitu

Fiskais eleitoral sira nia direitu maka:

- a) Permanese iha laran, iha sentru votasaun ka estasaun votu sira ne'ebé sira hetan kredensial bá;

- b) Husu esklaresimentu ba orgaun sira administrasaun eleitoral sobre material sira ne'ebé relasiona ho prosesu eleitoral no hetan esklaresimentu ne'ebé husu, iha prazu loron tolu nia laran;
- c) Hetan asesu ba dokumentasaun ofisial kona ba prosesu eleitoral;
- d) Kooperera ho fiskais sira seluk, atu nune'e prosesu eleitoral bele la'ok ho transparente no tuir orden;
- e) Iha asesu ba no komunika ho representante meu komunikasaun sosial sira;
- f) Hatoo deklarasaun hirak ne'ebé haree nudar conveniente ba orgaun komunikasaun sosial sira, basta maka la tau iha kauza lala'ok regular husi prosesu eleitoral ne'e rasik;
- g) Aprezenta, liu husi eskritu, reklamasaun no rekursu sira kona ba desizaun sira ligadu ba konformidade legal husi atu eleitoral rasik.

Artigu 55.º

Fiskais eleitoral sira nia dever

Fiskais eleitoral sira nia dever maka:

- a) Respeita Estadu Timorensis nia soberania, Repúblika Demokrátika Timor-Leste nia Konstituisaun no lei sira hotu-hotu ne'ebé vigora hela;
- b) Estuda no kuñese ordenamentu jurídku Repúblika Demokrátika Timor-Leste nian;
- c) Halo fiskalizaun ida ne'ebé objetiva, responsável no konsiente;
- d) Komunika ba orgaun sira administrasaun eleitoral sira kona ba kualker irregularidade, keixa ka reklamasaun ne'ebé verifika durante prosesu eleitoral;
- e) Labele interfere, perturba ka impede dezvoltamentu operasaun eleitoral ne'ebé la'ok hela;
- f) Labele fó orden ka instrusaun ba ofisial eleitoral sira;
- g) Hetan kredensial ne'ebé emite husi STAE no identifika-an ho kredensial no kartaun eleitoral perante kualker autoridade ka ofisial eleitoral ne'ebé solisita.

Artigu 56.º

Revogasaun ba fiskal nia kredensial

1. STAE revoga desizaun fo akreditasaun, ba fiskal ne'ebé maka la kumpra lei sira ne'ebé vigora iha Repúblika Demokrátika Timor-Leste ka viola dever sira ne'ebé maka prevé iha artigu 55º diploma ida ne'e ninian no komunika faktu ida ne'e ba fiskal ne'e rasik nomós kandidatura ne'ebé maka fiskal ne'e reprezenta.
2. Kona ba desizaun hodi halo revogasaun, bele halo rekursu ba CNE, ne'ebé bele prezenta iha prazu óras ruanulu-resin-hat nia laran.

3. Simu tiha STAE nia defeza, ne'ebé maka sei apresenta iha prazu máximu óras ruanulu-resin-hat nia laran, CNE sei decide iha prazu máximu óras hatnulu-resin-walu nia laran, ba kazu ne'ebé apresenta ona ba nia no sei komunika desizaun ne'e ba fiskal ne'e rasik, ba kandidatura ne'ebé fiskal ne'e representa nomós ba STAE.

Artigu 57.º

Fatin ne'ebé maka fiskais kandidatura sira sei vota

Fiskais kandidatura sira vota iha sentru votasaun ne'ebé sira hala'ó sira nia knar fiskalizaun nian.

Seksaun II

Observasaun prosesu eleitoral

Artigu 58.º

Pedidu akreditasaun nudar observador

1. Organizasaun nasional no internasional sira ne'ebé iha objetivu atu halo misaun observasaun eleitoral, iha rai-laran ka rai-liur, husu, liu husi hakerek, akreditasaun ba nia observador sira nian ba Diretor-Jeral STAE ninian.
2. Rekerimentu ne'ebé maka número anterior refere, sei akompaña ho dokumentu ofisial organizasaun nian, konstituisaun no regra funsionamentu sira husi organizasaun ne'ebé maka propoin atu halo atividade observasaun eleitoral no relasaun kompleta observador sira ne'ebé hola parte iha misaun, no ba kada observador sei hakerek iha ne'ebá:
 - a) Observador ida-idak nia naran kompletu;
 - b) Observador nia número eleitoral;
 - c) Observador nia fotokópia billete identidade ka kartaun eleitoral;
 - d) Fotokópia passaporte, kuandu observador ne'e internasional;
 - e) Observador nia fotografia 2 ho tipu passe.
3. Simu tiha dokumentu sira ne'ebé maka apresenta hodi prosesa pedidiu akreditasaun ba observador sira ne'e, Diretor-Jeral STAE sei decide kona ba emisaun kredensial iha prazu óras hatnulu-resin-walu nia laran.
4. Kredensial sira sei emite iha loron lima nia laran depois data ne'ebé maka hatama pedidu ba STAE husi organizasaun ne'ebé husu akreditasaun ba nia observador sira sira.
5. Ba desizaun indeferimentu sira, rekursu sei hatama ba CNE, ne'ebé bele apresenta iha prazu óras ruanulu-resin-hat nia laran, konta husi notifikasaun desizaun indeferimentu ne'e.
6. Simu tiha STAE nia defeza, ne'ebé sei apresenta iha prazu másimu óras ruanulu-resin-hat nia laran, CNE sei decide iha prazu másimu óras hatnulu-resin-walu nia laran ba rekursu ne'ebé maka apresenta ona ba nia no sei komunika nia desizaun ba observador, organizasaun ne'ebé observador ne'e

representa, STAE nomós ba Diresaun Migrasaun husi Polísia Nasional Timor-Leste nian.

Artigu 59º

Observador eleitoral nia kredensial

1. Observador nia kredensial iha informasaun sira hanesan tuir mai ne'e:
 - a) Observador nia naran kompletu;
 - b) Observador nia fotografia atualizada;
 - c) Ba observador nasional sira, tau sira nia número kartaun eleitoral;
 - d) Ba observador internasional sira, tau sira nia número pasaporte;
 - e) Organizaasaun ne'ebé observador representa ne'e nia naran;
 - f) Data emisaun ba observador nia kredensial;
 - g) Diretor-Jeral STAE nia assinatura;
 - h) Holograma ho Emblema STAE nian.
2. Modelu husi kredensial fiskal kandidatura ne'e inklui iha Aneksu II husi dekreto ida ne'e, ne'ebe hanesan parte integral.

Artigu 60.º

Observador nasional no internasional sira nia direitu

Observador sira nasional no internasional sira nia direitu maka:

- a) Hetan autorizasaun entrada no hela iha Timor-Leste, ba observador sira internasional sira;
- b) Sirkula iha sentru votasaun hotu-hotu no estasaun votu ne'ebé espalla iha terrioriu nasional nomós estranjeiru;
- c) Hetan esklaresimentu nesesáriu kona ba kuadru lejislativu eleitoral Timor-Leste ninian.
- d) Husu esklaresimentu ba orgaun sira administrasaun eleitoral sira kona ba matérial ligada ba prosesu eleitoral no hetan, iha prazu loron tolu nia laran, esklaresimentu ne'ebé husu;
- e) Hetan asesu ba dokumentu ofisial kona ba prosesu eleitoral nian;
- f) Iha asesu no komunika ho representante meu komunikaasaun sosial sira.

Artigu 61.º

Observador nasional no internasional sira nia dever

1. Observador eleitoral sira iha dever atu:
 - a) Respeita kuadru jurídiku-eleitoral ne'ebé vigora;
 - b) Hala'ó knar ho independênsia, transparênsia no neutralidade;
 - c) La interfere, perturba ka impede dezvoltamentu operasaun eleitoral ne'ebé la'ó hela;
 - d) Labele fo orden ka instrusaun ba oficial eleitoral sira;
 - e) Elabora no envia ba orgaun administrasaun eleitoral sira, kópia ida husi relatoriu observasaun eleitoral ne'ebé produz;
 - f) Komunika ba orgaun administrasaun eleitoral sira kona ba situasaun saida deit ne'ebé kria konfliktu interesse ho sira nia funsaun.
2. Observador identifika-an perante kualker autoridade ka oficial eleitoral, liu husi apresenta kredensial ne'ebé STAE emite ho kartaun eleitoral ka passaporte.

Artigu 62.º

Revogasaun ba kredensial observador

1. STAE revoga observador nia kredensial kuandu verifica basta ida husi situasaun sira tuir mai ne'e:
 - a) Viola lei no regulamentu ne'ebé vigora iha Repúblika Demokrátika Timor-Leste;
 - b) Viola dever hirak ne'ebé prevé iha artigu 64º husi diploma ida ne'e ninian;
 - c) Halo fali atividade hirak ne'ebé maka la kompativel ho estatutu nudar observador;
 - d) Situasaun hotu-hotu ne'ebé maka expressmente prevé iha lei ka regulamentu ida ne'e.
2. STAE komunika desizaun revogasaun ba observador ne'e, ba organizasaun ne'ebé maka observador ne'e representa nomós ba Diresaun Migrasaun Polísia Nasional Timor-Leste nian.
3. Depois komunika tiha desizaun revogasaun ne'e, observador entrega fila fali kredensial ne'ebé nia iha, iha prazu másimu óras ruanulu-resin-hat nia laran.
4. Iha situasaun ne'ebé maka observador la entrega voluntariamente nia kredensial, STAE sei komunika ho servisu diplomátiku no konsular sira iha área jeográfika ne'ebé maka sentru votasaun ne'e funsiona.
5. Bele halo rekursu ba CNE ba desizaun revogasaun ne'e iha prazu óras ruanulu-resin-hat nia laran.
6. CNE sei decide sobre rekursu ne'ebé maka apresenta ba nia iha prazu másimu óras hatnulu-resin-walu nia laran, konta husi apresentasaun STAE nia defeza.
7. CNE nia desizaun sei notifika ba observador ne'e rasik, ba organizasaun ne'ebé nia representa, ba STAE no ba mós servisu diplomátiku ka konsular sira iha área jeográfika ne'ebé sentru votasaun ne'e funsiona bá.

Seksaun III

Kobertura jornálistika iha prosesu eleitoral

Artigu 63.º

Profisional orgaun komunikaun sosial

Konsidera nudar profesional orgaun sira komunikaun sosial ninian maka jornalista no korespondente husi imprensa eskrita ka meiu audiovizual sira.

Artigu 64.º

Akreditasaun profesional orgaun sira komunikaun sosial

Akreditasaun ba profesional orgaun sira komunikaun sosial sei halo tuir termu sira ne'ebé maka hatur iha Diploma Governu ida ne'ebé aprova prosedimentu tékniku ba realizasaun atividade sira ba kobertura jornálistika ba Eleisaun Parlamentar nian.

Kapítulu VI

Dispozisaun finail no tranzitoria sira

Artigu 65.º

Reklamasau no protestu

1. Konsidera nudar protestu, atu ne'ebé maka dirije kontra irregularidade ruma ne'ebé deteta mas seidak hetan apresiasaun husi orgaun administrasaun eleitoral kompetente.
2. Konsidera nudar reklamasau, atu ne'ebé maka kontesta desizaun ruma ne'ebé halo apresiasaun ba irregularidade ruma ne'ebé apresenta no buka atu revoga tiha ka substitui tiha desizaun ne'ebé reklama.

Artigu 66º

Apoiu ba prosesu eleitoral

1. Servisu no organismu administrasaun públika sira tenki fó assistensia ba orgaun sira administrasaun eleitoral sira, iha ámbitu prosesu eleitoral nian.
2. Pessoal sira iha misaun diplomátika no postu konsular sira fó apoiu lojístiku no material tomak ne'ebé maka orgaun administrasaun eleitoral sira husu.

Artigu 67.º

Dever sijilu

1. Hotu-hotu ne'ebé maka direta ka indiretamente, hala'ó funsaun ka akompañá prosesu eleitoral iha sentru votasaun no estasaun votu ida-idak, sei sujeita ba

dever sijilu ligadu ba tratamentu dadus, informasaun no dokumentu sira ne'ebé maka sira iha kunesimentu ka iha asesu durante hala'ó sira nia funsaun.

2. Sira hotu ne'ebé maka númeru anterior ne'e abranje, tenki assina deklarasaun kompromissu, ne'ebé sei vinkula sira, antes hahú sira nia funsaun.

Artigu 68.º

Destinu buletin votu no ata operasaun eleitoral nian

1. Buletin votu no ata operasaun eleitoral, iha suporte papel no elektroniku, STAE maka sei halot, ba STJ nia dispozisaun, durante período tinan ida nia laran, depois de anuncia tiha rezultadu definitivu eleisaun nian.
2. Prazu ne'ebé refere iha númeru anterior liu tiha maka laiha determinasaun judicial ne'ebé kontráriu, STAE sei destroi tiha buletin votu sira, ho esepasaun ba ezemplar ida ne'ebé sei entrega, hamutuk ho ata operasaun eleitoral nian, ba Arkivu Nasional Timor-Leste hodi halo arkivu istoriku.

Artigu 69.º

Tribunal Rekursu

Enkuantu Supremo Tribunal Justisa seidaok hahú hala'ó nia funsaun sira, kompetensia sira ne'ebé nia hetan liu husi regulamentu ida ne'e sei ezerse husi Tribunal Rekursu.

Artigu 70.º

Entrada ein vigor

Dekretu Governu ida ne'e tama ba vigor iha loron ida tuir mai hafoin nia publikasaun iha *Jornal da República*.

Aprovadu iha reuniaun Konsellu Ministrus iha loron 11Maio 2017

Publika,

Primeiru-Ministru,

Dr. Rui Maria de Araújo

Ministru Administrasaun Estatal,

Dionísio Babo Soares, PhD

ANEXO I

Lista material eleitoral ne'ebé presiza ba funsionamentu sentru votasaun no estasaun votu sira iha estranjeiru:

1. Urna votasaun ho kedas ida-idak nia kódigu identifikasaun;
2. Buletin votu;
3. Tinta indelével;
4. Kabína votasaun ho númeru suficiente;
5. Formuláriu ata operasaun eleitoral
6. Folla rezultadu eleitoral sira;
7. Lista prezensa oficial eleitoral;
8. Deklarasaun kompromisu ne'ebé sei assina husi oficial eleitoral sira;
9. Livru observasaun;
10. Lista eleitor;
11. Lista eleitor adisional;
12. Lista eleitor iha misaun servisu;
13. Formuláriu rezultadu apuramentu nian hodi bele taka iha fatin públiku sira;
14. Formuláriu termu entrega material;
15. Dístiku ba estasaun votu nian;
16. Follaa avizu atu bele informa oficial eleitoral sira nia naran;
17. Ezemplar buletin votu, iha tamañu/ukuran bot;

18. Formuláriu ba reklamasau no protestu;
 19. Distintivu/tanda própriu ba ofisial eleitoral, fiskais kandidatura sira no observador sira;
 20. Karimbu ne'ebé dehan "CANCELADO";
 21. Karimbu ne'ebé dehan "RECLAMADO";
 22. Karimbu ne'ebé dehan "EM BRANCO";
 23. Karimbu ne'ebé dehan "NULO";
 24. Karimbu ne'ebé dehan "La Uza";
 25. Karimbu ne'ebé dehan "REJEITADO";
 26. Karimbu ne'ebé dehan "ABANDONADO";
 27. Karimbu ne'ebé dehan Eleição Presidencial 2017;
 28. Envelope ba buletin votu válido sira;
 29. Envelope ba buletin votu em branco;
 30. Envelope ba buletin votu nulo;
 31. Envelope ba buletin votu reclamado;
 32. Envelope ba buletin votu cancelado;
 33. Envelope ba buletin votu La Uza;
 34. Envelope ba buletin votu rejeitado;
 35. Envelope ba buletin votu abandonado;
 36. Lista nominal husi kandidatu sira hotu ne'ebé konkore ba eleisaun prezidensial;
 37. Kalkuladora ho número suficiente;
 38. Agrafador; lapijeira no pregu sira iha número suficiente;
 39. Fita adeziva;
 40. Formuláriu ata estasaun votu;
 41. Formuláriu ata rezultadu ba sentru votasaun sira;
 42. Formuláriu termu entrega urna ne'ebe mai husi sentru votasaun ba assembleia apuramentu nasional
 43. Formuláriu ba reklamasau no protestu;
 44. Selus siguransa numeradu;
 45. Urna ba transporta ata, reklamasau no votu sira reklamadu sira, karik iha;
- Material eskritooriu seluk ne'ebé konsidera nudar nesesáriu.